

ավագ քահանայության պատիվ՝ երեք քահանաներ: Ապա ամենքը մասնակցեցին Երեկոյան ժամերգության:

Հունվարի 30-ին Մայր Աթոռում շարունակվեցին տոնակատարությունները: Վաղ առավոտյան եկեղեցականների հանդիսավոր թափորը Վեհափառ Հայրապետին առաջնորդեց Մայր Տաճար, ուր կատարվեց Արևագալի ժամերգություն: Ապա Նորին Սրբության նախագահությամբ սկսվեցին քահանայից հավաքի երկրորդ օրվա աշխատանքները:

Հընթաց ժողովի զեկուցումներով հանդես եկան Ս. Մեսրոպ քահանա Արամյանը (Արցախի թեմ), Ս. Շմավոն քահանա Ղևոնդյանը (Արարատյան Հայրապետական թեմ), Ս. Շիրակ քահանա Խանոյանը (Սյունյաց թեմ), Ս. Գևորգ քահանա Կրտիկաշյանը (Արմավիրի թեմ): Քահանաներն իրենց բանախոսություններում անդրադարձան Եկեղեցու քարոզչության առավել աշխուժացման անհրաժեշտությանը: Կարևոր նկատվեց ժամանակակից տեխնիկական և լրատվական զանազան միջոցների արդյունավետ գործածությունը քարոզչական գործունեության մեջ:

Քահանայից հավաքի երկրորդ օրն ամփոփվեց Ամենայն Հայոց Հայրապետի օրհնության խոսքով: Նորին Սրբությունը հորդորեց եկեղեցականներին Ղևոնդյանց ոգով իրենց ծառայությունը մատուցել մեր ժողովրդին և Հայրենիքին:

ՎԱՐԴԱՆԱՆՑ ՏՈՆԸ ՄԱՅՐ ԱԹՈՌ ՍՈՒՐԲ ԷԶՄԻԱԾՆՈՒՄ

Հունվարի 31-ին՝ Սրբոց Վարդանանց տոնին, Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի հանդիսապետությամբ մատուցվեց Ս. Պատարագ: Պատարագիչն էր Գևորգյան Հոգևոր Ճեմարանի տեսուչ Ս. Սահակ վարդապետ Մաշալյանը:

Հավարտ Ս. Պատարագի Վարդանանց խորհրդին անդրադարձավ պատարագիչ Հայր Սուրբը: Նշելով, որ Ավարայրի մարտը ընթանում էր հանուն հայ հավատի ու ոգու պահպանման, Հայր Սուրբն ասաց. «Մեր պատմության ընթացքում մենք բազմիցս կորցրել ենք մեր պետականությունը, սակայն քանի որ կանգուն էր մեր միջնաբերդը՝ Հայ Առաքելական Եկեղեցին, և մեր հավատքը, մենք վերստին կարողացել ենք կերտել մեր ներկան և ապագան»:

Վարդանանց տոնին Հայ Եկեղեցին տոնում է նաև Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի անվանակոչության օրը: Այս առիթով Իջման Ս. Սեդանի առջև կատարվեց Հայրապետական մաղթանք՝ Մայր Աթոռ Սուրբ Էջմիածնի անսասանության ու պայծառության և Նորին Սրբության քաջառողջության ու կենաց արևշատության համար:

Սրբազան արարողությանը ներկա էին Հայաստանյայց Առաքելական Սուրբ Եկեղեցու թեմակալ առաջնորդներ, Մայր Աթոռի միաբաններ, Գևորգյան Հոգևոր Ճեմարանի սաներ և բարեպաշտ հավատացյալներ:

Ս. Պատարագից հետո Գևորգյան Հոգևոր Ճեմարանում տեղի ունեցավ հանդիսություն՝ նվիրված Ս. Վարդանանց անմար հիշատակին: Բացման խոսք ասաց Գևորգյան Հոգևոր Ճեմարանի փոխտեսուչ Տ. Դավիթ աբեղա Քարամյանը, ապա Վարդանանց նվիրված բանախոսությամբ հանդես եկավ բանասիրական գիտությունների թեկնածու Խաչատուր Վարդանյանը:

Հանդիսությունը եզրափակվեց Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի օրհնության խոսքով: Անդրադառնալով Սրբոց Վարդանանց խորհրդին՝ Ամենայն Հայոց Հայրապետը նշեց, որ այն սեր է առ Հայրենին և առ Երկնավոր մեր Տերը, հավատարմություն Հայրենիքին և հավատքին: Այդ խորհրդով դարեր շարունակ կրթվել ու դաստիարակվել է հայ ժողովուրդը, ապրել, արարել, մարտնչել ու պաշտպանել Հայրենին: Վեհափառ Հայրապետն ընդգծեց, որ այդ խորհրդով ապրելը հրամայական է նաև մեր ժամանակների համար: Նորին Սրբությունը նշեց, որ սերն առ Հայրենին և սերն առ Աստված պիտի լինեն երաշխիքը մեր կյանքի բարօրության և ինչպես դարեր շարունակ, այնպես և այսօր պետք է ապահովեն հայ ժողովրդի լինելիությունը և ընթացքը դեպի նոր հազարամյակներ: Ամենայն Հայոց Հայրապետը հորդորեց ամենքին նմանվել Սրբոց Վարդանանց, սեր դրսևորել աշխատանքում, զորեղ լինել հավատքի մեջ և Վարդանանց պես նոր հաղթանակներ արձանագրել իրենց կյանքում:

Հանդիսության ընթացքում ասմունքով և գեղարվեստական կատարումներով ելույթ ունեցան Գևորգյան Հոգևոր Ճեմարանի սաներն ու Մայր Աթոռի և ՀԲԸՄ հովանու ներքո գործող Նորքի Հայորդյաց տան «Հայկազունք» համույթը:

*ՄԱՅՐ ԱԹՈՐ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*